

105



12821







SUVREMENI HRVATSKI PISCI

KNJIGA DVADESETA



IZDANJE HRVATSKOG IZDAVALAČKOG BIBLIOGRAFSKOG ZAVODA

VINKO KOS

L A D A

ZAGREB 1944



CRTEŽ PJESNIKA  
JEROLIM MIŠE





# PROTULETJE



## ŠTIMAJTE SE, ŠTIMAJTE

Štimajte se, štimajte  
svojimi zemljami,  
Zagorci vu Zagorju  
z njegvimi gorami.

Imamo mi, imamo  
malo Međimurje,  
ošter plug mu z voleki  
črne brazde orje.

Široke su, široke  
rodne mu ravnice,  
grozdjiča su slatkoga  
pune mu gorice.

Lepe su međimurske  
puce i snešice,  
čardeš si zapplešeju,  
črleno jim lice.

Štimajte se, štimajte  
Zagorci Zagorjem,  
mi se bomo štimali  
z malim Međimurjem.



## SPOMINEK

Drava, Mura, vode naše,  
međimurske vode,  
rečite nam, rečite nam,  
kaj vre z toga bode?

Čim spusti se nočka temna  
i na svet tišina,  
sosedova čerka Mara  
z Miškom se spomina.

Nikaj novo, nikaj novo,  
što se tomu čudi,  
svati bodo v našem seli,  
boži, smešni ludi.

## LADA

Bela Lada cvetje nosi,  
ide k nam z otoka,  
protuletje tu je drago,  
hertar z bičom poka.

Protuletje, protuletje,  
drage tople vure,  
svoje popke su odprle  
vrba polek Mure!



## KOTORIBSKE ROŽE

Kotoribsko polje,  
poljiče široko,  
cvetjiča si puno  
kamgod segne joko.

Kotoribske puce  
po tvem polju šeču,  
cvetjiče si беру  
v kučicu ga meču.

Mara bode lmbri,  
Kata lvi dala,  
pak se bo mu jošče  
slatko nasmijala.

## POPEVKICE

Popevkice male,  
male kak ti,  
vu njima tuge  
ni žalosti ni.

Štel bom jih tebi,  
štel ti jih pak,  
nasloni na rame  
meni se tak.

Sami smo, sami,  
tihi je kraj,  
predi nek počnem  
kušlec mi daj.



## ROŽICA JE NA OBLOKU

Rožica je na obloku,  
sozica je v tvojem joku,  
mujcek ti moj mali.

Rožicu bom fkral z obloka  
sozicu ti zbrisal z joka,  
mujcek ti moj mali.

Pak se bom ti podsmehuval,  
kroglo lice ti kušoval,  
mujcek ti moj mali.

Ti se na me ne boš srdil,  
s kušlecom boš to potvrdil,  
mujcek ti moj mali.

## STANI SE GORI, MARICA

Stani se gori, Marica,  
zišla je zvezda danica.

Treba bo iti v poljiče,  
doklem je mehko grudjiče.

Dečki črez selo fučkaju,  
za tebe, čerka, pitaju.

Stani se, stani, Marica,  
zašla bo zvezda danica.

Zišlo bo, zišlo sunčece,  
znalo bi plakat srčece.



## MILA MOJA

Mila moja, mila moja,  
kaj ne čuješ ti,  
kaj nam z kitja, kaj nam z kitja  
fričica veli.

Spevaj si, o spevaj, mila,  
naj mi tožna bit,  
ja se bom povrnul k tebi,  
če moram odit.

## FTIHNULI SU

Ftihnuli su, ftihnuli  
puti i stezice,  
tiho su se vužgale  
na nebu zvezdice.

Zadnja kola ružiju,  
ideju z hatara,  
puca se pri zdenčecu  
z dečkom dogovara.

Kola jače ružite,  
da se sem ne čuje,  
kak se dveh pri zdenčecu  
od srca kušuje.



## LJUBAV

Ljubav je nekaj vu srcu,  
nekaj kak zlata nit,  
nekaj kaj saki opazi,  
nekaj kaj ne da se skrit.

Vu tu se nit nam zaplete  
pamet i čitavi svet,  
Vse nam tak lepo postane,  
duša se zdigne vu let.

Ljubav je nekaj vu srcu,  
nekaj kaj ne da se reč,  
nekaj, gda imamo puno,  
mi si želimo još več.

## KITJIČU NA DREVJU

Kitjiču na drevju  
v šumi vuz potoke,  
pripovedam kak su  
joči ti globoke.

Gda se zlato sunce  
tam za bregom vgasi,  
pripovedam kak su  
zlati tvoji lasi.

Ajngel da mi v trudnu  
dušu mir zaklepa,  
pripovedam kak je  
tvoja duša lepa.

Pak će gdagda vse se  
zvezde pogasiju,  
tvoje drage joči  
v mraku mi goriju.



## ČE POGLEDAM VU TO POLJE

Če pogledam vu to polje  
široko, zeleno,  
vidim vu njem drobno cvetje  
pisano, črleno.  
Kak je lepa detelica  
med cvetjem dišečim,  
tak si lepa ti med vsimi  
z ličecem žarečim.

## MESEČINA

Zibleju se listi  
na vetriču lehkem,  
mesečina hodi  
ti po krilu mehkom.

Draga tvoje ruke,  
draga črne lasi,  
moje srce šepče:  
moja, moja vsa si.



## JOČI

Srčece malo,  
gombek ti moj,  
pogled tak dragi,  
tak mili je tvoj.

Zvezdice svetle,  
jokice te,  
tak čiste, tak črne,  
bliščeče tak vse.

Vu njima skrito  
nebo je vse:  
Srečen, presrečen,  
gdo ljubiti jih sme.

## SLAVUJČEK

Ftiček drobn, ftiček jen  
z grma je odletel,  
svojom milom vižicom  
potok je preletel.

On ve v tihom grmjiču  
proba svoje viže,  
štere tvemu srčecu  
lepše su i bliže.



## STEZICA

Stezica bela  
prek gore pela  
do onog sela,  
gde ti mi živiš.  
Je li soze brišeš,  
je li pismo pišeš,  
ili morti rože  
za mene sadiš?

## KLINČECI

Klinčeci dišeći,  
klinčeci beli  
dva mi v obloku  
su se rascveli.

Vekši bo za te,  
menjši bo za me,  
da se ti ne bi  
srdila na me.



## MAMA MENE ŠPOTA

Mama mene špota,  
zakaj sem prek plota  
dragog k sebi zvala,  
pak mu kušlec dala.

Teško je trpeti,  
ljubav v srcu meti,  
z dragim se ne ziti,  
dalko od njeg biti.

## MALA IGRA

Cvet črleni nije plav.  
— Dobro, dobro, imaš prav.

Polič, vedra nije škaf.  
— Nikaj zato, imaš prav.

Ja te nečem, imam prav?  
— Reci drugač, nemaš prav!



## MATUL

Kaj ne vidiš, mila moja,  
da bi lahko roka tvoja  
vlovila matula?  
On leti okoli tebe,  
nudi drugim samog sebe,  
je li si me čula?

## PROTULETJE

Vre sončece drago toplo nam greje  
i snegi se zadnji taliju.  
Podlesek vu grmu veselo se smeje,  
fijolice prve dišiju.

Protuletje drago k nam se pak vrača,  
spod krune dišečega cveta.  
Ah vse se povrača, vse se povrača  
samo ne minula leta.



## DRENEK

Zakaj si tak rano, drenek  
z cvetjem vun pogledal?  
Sigurno bi nekaj lepog  
ti rad nam povedal.

Poveč nam, o žuti drenek,  
kaj nam reči imaš,  
zakaj nam tak namigavleš  
i veselo klimaš?

Sigurno bi štel nam reči,  
kak ve srečen svet je,  
kaj dohaja, vre dohaja  
drago protuletje.

## DEŠČ ŠKROPI

Dešč škropi, dešč škropi,  
s temnih i gostih oblakov.  
Vse tak tožno, tak tožno zgledi,  
videt ni sunčanih trakov.

Pokaži, pokaži se, sunčece nam,  
da lepo boš opet nam grelo,  
vsaka bo žalost zginula mam  
i vse bode taki veselo.



## POTOK

Voda teče po potoku,  
radost tebi je vu joku.

Drevje v vetru se zniha,  
mesec k nam se nalukava.

Štel bi čuti naše reči,  
stari huncvut tud hodeči.

Tiho, tiho mesec bodi,  
da boš došel pak med ljudi.

Nikaj ne smeš nikom reči,  
kaj si saznal tud hodeči.

Em znaš, mesec, da mi mladi  
imamo te najbolj radi.

Kaj si seznaš moraš skriti,  
moraš tiho, tiho biti.

## PROTULETNA

Vrbe su precvele, trobentica brni,  
videl sam vre belog matula kak leti.

Bombrek se napinja, štel bi postat cveč,  
oj zbogom, srček slatki, odhajam ti vu svet!

Drugo protuletje, gda došlo bo nam pak,  
ja ti bom bogati, ne bom siromak.

Onda ti bom rekel: ljubljeni picek moj,  
ženica si moja, a ja sem mužek tvoj.



## MURA VODA TEČE

Mura voda teče  
vu te stranske kraje,  
reči, zakaj plačeš,  
tvemu srcu kaj je.

Morti kaj su glogi  
naglo tak ocveli?  
ili se kaj drugo  
pripetilo v seli?

Najte me zmišlavit  
na dišeče gloge,  
kajti srce moje  
vmrlo bo od toge.

Teče Mura voda,  
v stranske kraje teče,  
za golobom mojim  
mene žalost peče.

'dišel je, odišel  
gda su glogi cveli,  
ja sam pak ostala  
sama v svojem seli.

# LETO



## TOŽNA JE, TOŽNA DOBRAVA

Tožna je, tožna dobrava,  
lepa je, lepa ma draga,  
Lado, Lado oj.

Cvetje daj dobravi žalosnoj,  
radosti mojoj ljubljenoj,  
Lado, Lado oj.

Cvetje bo v venčke spletala,  
v Muru jih vodu metala,  
Lado, Lado oj.

Mura bo voda šumela,  
moja bo duša vesela,  
Lado, Lado oj.



## VETER

Vuni pod mojim oblokom  
veter se plače, šumi;  
zakaj si tožen, moj veter,  
žalost poveč mi ti.

Tvoju sem zemljo preletel,  
vu njoj te videti ni,  
bregi spitavleju za te,  
tožno klopotec brni.

Veter, moj veter šumeči,  
ti se obrni nazaj,  
vsakomu cvetu i bregu  
srca del mojega daj!

## TRI GOLOBI

Tri golobi odleteli  
z lepog Međimurja  
odleteli, odleteli  
prek širokog morja.

Iskali su lepše kraje,  
sebi gnezda vekša,  
nisu našli lepše kraje  
niti gnezda mekša.

Iskali su svemu srcu  
drage golobice,  
nisu nigde lepše našli  
srcu pajdašice.

Tri golobi doleteli  
prek širokog morja,  
nigdar več ne odleteli  
z lepog Međimurja.



## VRBE

Vrbe kraj Drave stojiju,  
kitje se k vodi zlukava,  
vure tak naglo bežiju,  
srce tak teško ščekava.

Morti si kanticu svoju  
v zdencu globokom ftopila,  
morti si srcece mlado  
negdi na putu zgubila.

Vrbe kraj Drave stojiju,  
kitje se k vodi zlukava,  
vure tak naglo bežiju,  
srce vre za te spitava.

## MOJ AJNGELEK

Trdi je život,  
ali je lep,  
ljubav ga kiti,  
ljubav ga sladi,  
moj ajngelek.

Dugi su dnevi,  
črna je noč,  
ljubav je slatka,  
ljubav je svetla,  
moj ajngelek.



## KUPITE MI, MAMA

Kupite mi, mama, robca tibetnoga,  
i čizmice žute z visokim petami,  
furtufa od svile z širokim šlingami,  
robaču črlenu z voskimi faldami.

Kaj boš, čerka, kaj boš od tibeta z robcom,  
z čizmicami žutim z visokim petami,  
z furtufom od svile z širokim šlingami  
z robačom črlenom z voskimi faldami.

Da bom k meši išla, kaj me dragi vidi,  
med drugimi na me svoje oči hiti  
pak vu srcu reče: moja mila draga,  
grlica je lepa, šteroj nema para.

## ZAPUŠČENO SRCE

Moči, srce, moči,  
kaj te nišči neče,  
makar si tak puno  
ljubavi goreče.  
Zvezde bodu čule  
črnu žalost tvoju,  
one bodu dale  
tebi ljubav svoju.



# 'DIŠEL SINEK VU VOJNU

(Po starinskoj popevki)

'dišel sinek vu vojnu,  
doma stavil Katicu,  
doma stavil Katicu,  
lepu vrtnu rožicu.

Došel sinek iz vojne,  
neje našel Katicu,  
neje našel Katicu  
lepu vrtnu rožicu.

Sinek pital majkicu:  
gde je moja Katica,  
gde je moja Katica,  
lepa vrtna rožica?

Gda si 'dišel vu vojnu,  
te je tvoja Katica,  
'dišla v polje rožic brat,  
'dišla v polje rožic brat.

Išel sinek v poljiče  
iskat svojo Katicu,  
lepu vrtnu rožicu,  
lepu vrtnu rožicu.

Pital sinek cvetjiče:  
gde je moja Katica?

Cvetjiče se zibalo,  
neje mu povedalo.

On prestopi hižni prag,  
pak potegne sablicu,  
svojo svetlu sablicu,  
'dseče majki glavico.

Pak zamahne drugi pot,  
i prepiči sebe prek,  
i prepiči sebe prek,  
pak se vmori za navek.



## HRUSTEKOV BALAŠ

Dober vam je človek bil  
Hrustekov Balaš,  
gde je piti trebalo  
tam je bil pajdaš.

Rad ni imel bombosa,  
bidru ni kolač,  
glavno da namakal je  
z vinom si mustač.

Huškal je, popeval, klel,  
plesal tu i tam,  
mlade snehe gledati  
ne ga bilo sram.

Ali dneva jenoga  
hrast se je podrl,  
zvoni su zazvonili,  
i Balaš je vmrl.

Bože moj, kak čuden je,  
čuden život naš:  
zdavna, zdavna živel je  
Hrustekov Balaš...

## POSLUHNI ME

Pucica draga,  
pucica slatka,  
radost v životu  
vsaka je kratka.

Zato da žalost  
v srce ti dojde,  
z lica vedrina  
naj ti ne projde.

Prešla bo žalost  
bo se zgubila,  
sreča bo došla  
štera je bila.



## MED ŽITOM

V žitu se visokom  
črleniju maki,  
daj me, daj počakaj,  
došel ti bom taki.

Nabrat sam odišel  
drobno cvetje za te,  
z njim bom ja okinčil  
tvoje lasi zlate.

V žitu se visokom  
črleniju maki,  
grličica moja,  
došel ti bom taki.

## MED NAMİ

Zakaj su, draga, med nami  
bregi i vnoge doline,  
zakaj vu ljubavi tožno  
srčece mlado mi gine?

»Bog bo te brege približil,  
srce bo k srcu dopelal,  
došel bo katan i nas bo  
k zdavanju v cirkvu odpelal.«



## BOG MOJ

Iščeju te naše misli,  
Bog moj.  
Lačne su te naše želje,  
Bog moj.  
Sunce se za gore spušta,  
Bog moj.  
Truden človek pokoj išče,  
Bog moj.

## JESEN



## BEREKI

Črez jesensku gostu meglu  
voda v jačkaj se blišči,  
črna zemlja pod njom plače,  
zgubljen jen fazan kriči:

O bereki, vi bereki,  
iz vas raste dugi šaš,  
kaj nam hasni ta molitva:  
»Daj nam kruha, Otec naš?«



## CESTE

Mati zemlja, Međimurje,  
zemlja lepa tak i draga.  
Kam pelaju tvoji puti,  
kam bežiju tvoje ceste?

Mati zemlja, zemlja draga,  
moja mati, Međimurje,  
tvoji puti pelaju mi  
prek črez srce i črez dušu.

## MEĐIMURJE

Jablani kraj ceste. Selo.  
Ljudi. Ravnice.  
Koruze, slogi, meja do meje,  
senokoše, brežanjki, gorice.

Drava, vrbe, Trnava, Mura, bereki,  
šume, gmajne, ceste i kolniki.  
Čakovec, Prelog, međimurski sir.  
Teliči, pajceki, konji, krave i biki.

Šandari, općina, štacuni.  
Cirkva, plebanuš, farof i škola.  
Mužika v krčmi. Tanec.  
Popevka, huškanje i dobra volja.



## JESENSKA

Srce pita, tožno srce,  
pita za te v straniškom svetu:  
je li su orehi zreli,  
je li šošja vre koruza?

Kaj delaju snehe v seli,  
kak starjapa kaj živiju,  
je li se nam nej podrla  
stara hruška za pečnicom?

Morti su se vre v gorica  
javili jesenski grili,  
morti se vre vu te dneve  
čuje z bregov i klopotec?

Jesen draga, žuta jesen,  
v dragom kraju, v Međimurju.  
Je li bom ja jesen našel,  
dragu jesen v dragom kraju?

## GORIČNA

Pod brajdom se javil ščuriček,  
zategnjeno vleče svoj: zri.  
Črez srce je radost mi prešla,  
kaj grozdjiče slatko zori.  
Požurite dnevi se bratve,  
oditi bom moral otod,  
ostaviti brege gorične  
i vinski, dragi taj kot.



## ZVEZDICE NA NEBU

Zvezdice na nebu, čujte mi popevku,  
kaj mi srce mlado žalostjom razdira.  
Ostal sam kak šterče samo na tom svetu  
štero nemre najti sebi nigde mira.  
Mati moja draga, Međimurje malo,  
dalko si predalko, a k srcu priraslo.  
Vse je moje steze, moje drage steze,  
i celo mi srce trnjice preraslo. —

## KAK JE LEPO GLEDAT

Kak je lepo gledat  
vu te brege tvoje,  
vu to polje ravno,  
Međimurje moje.

Kak piščanci k kvočki  
k tebi se tiščimo,  
k tebi smo prirasli,  
za te se držimo.

Malo Međimurje,  
kak bi mogel biti  
pa bi tebe jenpot  
prestal ja ljubiti?

Nigdar ne bo toga,  
nigdar za nigdara,  
kajti v celom svetu  
tebi nema para.



## VRBE

Vrbe, vrbe, sive vrbe,  
kaj se tožno tak držite?  
Zakaj vu tu plavu vodu  
žalosno navek gledite.

Morti zato, kaj ja ne znam  
z drugim dosta dober biti,  
pak se, vrbe, mesto mene  
morate vi žalostiti.

## FIJOLICA

Fijolica plava, dišeča,  
kak lepo i slatko dišiš,  
najlepša od vsega si cvetja,  
a ti se tak z tiha držiš.

Povedat mi kak da bi štela,  
da moral bi sličen ti bit,  
vse dati od sebe kaj imam  
i živet pozablen i skrit.



## GIZDAVA MARA

Bila si Mara gizdava,  
nesi me gledati štela,  
niti si čuti ne dala,  
da bi za moža me zela.

Ve pak si sama ostala  
vsaki se norca ti dela,  
Mara, oj Mara gizdava  
nesi za moža me štela.

Druge si gledala rajše,  
cvetje kaj vse su ti fkrali,  
lepe povedali reči,  
al srce nesu ti dali.

Mara, oj Mara gizdava,  
nesi me gledati štela,  
ve je, o ve je prekesno,  
da bi za moža me zela.

## KOLJANI

Japica se po hiži šečeju,  
mošnjicu za repek vlečeju ....

Da bi se oni zmislili  
i škudu nam zlatu stisnuli.

Došli smo zdalka, zdalkoga,  
došli iz sveta stranjskoga.

Z svetom popevkom putujemo,  
vsaku mi hižu poštuemo.

Rado mi vsikam zajdemo,  
dobra gde srca najdemo.

Čujte nas, hižni japica,  
naša popevka je gotova.

Mošnjicu svojo spuknite,  
škudu vun zlatu zvlečite.

Darek vi mali darujte nam,  
zdravlje i srečo želimo vam.



## V SUBOTU NA VEČER

V polju po koruzi tikve za pogače mama su nabrali,  
japa su je s travom dimo na ornicaj v mraku dopelali.  
Kola su pod kapom, motike v komori, zutra se ne dela,  
vse je vuni v redu, fala budi Bogu, zutra je nedela. —

## STARJAPA I JESEN

Starjapa pred hižom sediju,  
sediju i pipu kadiju.

Vse listje je z dreva opalo,  
življenje je bratvu pobralo.

Starjapa si pipu kadiju,  
kadiju i v zemlju glediju.



## POD JESEN

Pod vsakim voglom drobni gril jesenski  
na svoje štrunje vleče tožnu vižu.

O zapri, dete, zapri hižna vrata,  
da veter žuto listje ne donese v hižu.

Oblaki beli kak husari fletni  
tak žurno nekam jašeju nad nami.

O zapri, dete, zapri hižna vrata,  
beži i jesen. Taki bomo sami.

## ZA DEVETOM GOROM...

Zibu, haju, dete malo,  
kaj boš slatko mi zaspalo.

V lepe senje ti se skrij,  
zibu, haju, spij mi spij.

Za devetom gorom huta,  
a pred hutom junak mlad...

Zibu, haju, dete malo,  
on bi tebe videl rad.

Zibu, haju, dete malo  
kaj boš slatko mi zaspalo.

V lepe senje ti se skrij,  
zibu, haju, spij mi, spij...



## CMREKI V SNEGU SPIJU

Cmreki v snegu spiju,  
fličic čuti ni,  
k nam pod strehu dojdí,  
mali Jezuš ti.

V zlatu i srebrini  
bor se ves blišči,  
k nam pod strehu dojdí,  
mali Jezuš ti.

Srce je betežno,  
vu njem sreče ni,  
zvrčiti ga moreš,  
mali Jezuš ti.

Sveta noč je tiha,  
mali Jezuš ti,  
v našu hižu dojdí,  
čakamo te mi.

## DUGI SU VAŠI MUSTAČI

Dugi su vaši mustači  
i lasi seri vam vsi,  
ali ste svojemu sinu  
radost jedina još vi.

Mama su v zemljici črnoj  
i tam ve čakaju nas  
nikoga, nikoga, japa,  
drugoga nemam kak vas.

Večpot se zmislím na dneve,  
da mali dečarec sem bil,  
čudaj sem toga napravil,  
pred šibom za vogel se skril.

Onda sem mislil da hudi  
i zločesti otec ste vi  
Vezda, a vezda, moj japa,  
vse drugač to meni zgledi.

Radi ste meli nas zmirom  
i neste želeli nam zlo.  
Japa, oprostite sinu,  
prekesno kaj spoznal je to.

Sami smo vezda ostali  
kak rosnate kaple dve,  
sunce i nas bo povleklo  
gde ocov ni sinov već ne.



## JAPI

Senokoše v Sombathelu,  
vulice v Kaniži,  
topla noč med zlatim žitom,  
čardeš v noroj viži.

Znam, da vse to vaša duša  
zabiti ne more,  
to vam zmirom srce zove  
za Lendavske gore.

Isti tam su oni puti  
kaj so negda bili,  
iste sence, ista polja  
kod ste vi hodili.

Mrzle ve su one sence  
mrtva ona polja,  
tam vas vezda ne bi našla  
stara dobra volja.

Tam ve sreču ne bi našli  
kaj je biti znala,  
kajti z one je ravnice  
mladost vam nestala.

Mariška se oženila,  
zabila vas zdavna,  
kak i cela ona zemlja  
široka i ravna...

## MATI SEDEM ŽALOSTI



DOBER večer, dragi japa,  
došel sem iz stranjskog sveta.  
Rečite mi, kaj se zbilo  
za ta duga, duga leta.

Sinek dragi, dete milo,  
srce mi se tožno para,  
matere več ne boš videl  
nigdar, nigdar za nigdara.

NA BREGU je cirkva,  
okoli par hiž,  
za hižami cintor,  
na cintoru križ.

Pod križom je mati  
kaj trdo tak spi,  
vu srcu je rana,  
kaj strašno boli.

ZBUDITE se, mamika,  
z vun tog hladnog grobeka,  
pri njem bote videli  
plakat svojeg sineka.

Zdignite se, zdignite,  
z vun te črne zemljice,  
štel bi vam povedati,  
kaj mi peče srčece.



ŠTO ME zove z grobeka,  
što mi plaši senje?  
ne ga me vu grobeku,  
'dišla sem med tenje.

Vse je meni mrtvo ve,  
i ti kaj me zoveš.  
Nigdar več me z zemljice  
črne ne dozoveš.

LEPO, milo prosim vas,  
mati moja mila,  
da se na tu prošnju mi  
ne bi oglušila.

Je li samo zato ja  
ne bom moral vmreti,  
kaj več svojeg sineka  
ne mreže razmeti?

ZBOGOM, zbogom, dragi japa  
idem ja po svetu,  
bog zna, da li bom se vrnul  
dimo opet k letu.

Tu je vse tak tožno, tožno  
blizu njenog križa,  
prazen grunt je, vrt i bregi,  
prazna rodna hiža.

ROŽICA, naj bo ti telo  
štera do Boga bo zrasla.  
Zvezdica, naj bo ti duša  
kaj nigdar ne bo mi vgasla...

VSAKU večer tvoje roke  
zmočene gledim pred sobom  
i postane meni teško,  
teško v srcu mi za tobom.

Žmehka, črna zemlja skrivle  
tvoje telo, mati moja,  
ali tvoje srce z nami  
blodi dale brez pokoja.



# LADA

mistična kantata u četiri diela  
iz prastarih vremena Međimurja



## POČETNA MOLIVA LADI

Zemlja je tak trda, Lada si nam ti,  
šume su tak črne, človek se boji.  
Jezero je src i jezero je rok,  
čuj, o čuj nas ti i dobri Svetlobog.  
Protuletje daj nam, listje daj i sad,  
zvezdice i rosu, sunčece i hlad.

## PROTULETJE

### SOLO:

Prazne so nam roke,  
prazen nam je vrt,  
tožni su potoki,  
i šumeče vode.  
Zimu ti pretiraj,  
žalosti i smrt,  
međimurska zemlja  
naj vesela bode.  
Bombrek se napinja,  
cvetje si želi,  
narodu pomori,  
bodi dobra ti.

### ZBOR:

Pomori nam, Lada, pomori,  
v našem ti srcu tronuš stoji,  
I Svarog je velik, i Danica svetla  
ali toj zemlji kraljica si ti.



Naj se rascvete pšenica vu polju  
i grozdje i šafran i spuni se klas.  
Prosiju deca međimurske zemlje  
da dobra, bogata posluhneš ti nas!

LADA:

Dečica moja zemlje ljubljene  
z oblakov i sunca ja vas gledim  
Otpri se bombrek, rascveti se cvetje!  
Darovati zemlju vsim blagom želim.

## LETO

MUŽKI ZBOR:

Žito je kak zlato,  
polje je bogato,  
Lado, Lado, oj!

Zrela je kupina,  
trda je lupina,  
Lado, Lado, oj!

Sunce je zapeklo,  
v zemlju se zaseklo  
Lado, Lado, oj!

ZBOR:

Dršče trava, dršče srdce, polje lepo je,  
toče, strele, ti nas čuvaj, hudog vremena.  
Vse kaj tu je, ti si dala, naj nam zeti to.

LADA:

Velike su tvoje brige vu te dneve, o težak,  
Rodovitno i bogato poljiče je tvoje tak.  
Kaj sem dala, ne bum zela tebi z roke več.  
Jesen tu je, list na vetru šošja ti šumeč.

## J E S E N

SOLO:

Jesen, jesen, oj bogata,  
rekla mi je moja Kata,  
da bo došla v bratvu k nam.

V goricami bom zahušnul,  
grličicu svoju kušnul  
i za ženu zel ju mam.

Jesen, jesen, oj bogata,  
mene rada ima Kata,  
oj katani, čujte me.

Vince teče puno žara,  
idu kola več s hatara,  
svate mi pozovite.

ZBOR:

Tvoje su roke bogate i sipljeju dare  
vu srdca, v komore, v globoke košare.  
Hvala ti, Lada, oj jezero pot!  
Hiže su pune i parme i kleti,



živeža dala nam si do k leti,  
zvrhom su police, pun saki je kot.

#### LADA:

se sam dala, kaj sem mela, prazne su mi roke.  
Listje se je posušilo, zaprite obloke.  
V sreči vašoj, deca moja, trdo ve bom spala.  
Kaj sem mela, vse sam dragom Međimurju dala.  
Ali pak da zima projde, bom se ja zbudila  
I dobrava se bo mrtva pak zazelenila.

### Z I M A

#### SOLO:

Ledenbog je Muru vodu  
v težke vkoval lance,  
veter nam je ve zametal  
pola vsa i klanjce.

Svantovid se skril i Zora,  
tožen celi svet je.  
Gde si, Lada, gde si sunce,  
gde si protuletje?

#### ZBOR:

Zemlja je tak trda, Lada si nam ti,  
šume su tak črne, človek se boji.  
Jezero je src, i jezero je rok,  
čuj o čuj nas ti i dobri Svetlobog.  
Daj pokaži, Lada, sveti obraz svoj,  
tožno tebe zove verni narod tvoj.

#### MANJE POZNATE RIEČI

Štokavac ne će nailaziti na znatnije poteškoće kod čitanja ove knjige pjesama, pisanih u međimurskom narječju — osim kod izraza, koji su posuđeni iz mađarskog ili njemačkog jezika. Predpostavlja se ipak, da će takav čitalac i bez komentara znati, da je n. pr. ajngel — anđeo, ajngelek — anđelak, a pogotvo ne će teško razumjeti rieči, u kojima se nalazi kajkavsko »o« mjesto štokavskoga »u«: bloditi — bluditi, dobrava — dubrava, golob — golub, gost — gust, kot — kut, kod — kuda, koruza — kukuruz, roža — ruža, rožica — ružica, sosed — susjed, sozica — suzica, tožan — tužan, toča — tuča itd.

berek — rît  
betežen — bolestan  
bidra — neki kolač  
bom, boš bo — ću, ćeš, će  
bomo, bote — ćemo, ćete  
bombrek — pupoljak  
bombos — šećer  
bratva — berba  
brneti — brujati

cintor — groblje  
cmrek — smreka

cvetičje — cvieće

čardeš — čardaš  
če — ako  
črez — kroz

dečarec — dječak  
dešč — dažd, kiša  
dimo — kući  
dišeći — mirisan  
dišeti — mirisati  
'dišel — otišao



'dišla — otišla  
dopelati — dovesti  
dragati — milovati  
drenak — drienak  
drevje — drvlje  
'dseći — odsjeći

em — pa, ta

falda — nabor  
farof — župni dvor  
fijolica — ljubica  
fkrasti — ukrasti  
fleten — brz, okretan  
ftiček — ptica  
ftičica — ptičica  
ftihnuti — utihnuti  
ftopiti — utopiti  
furtuf — pregača

gda — kada  
gdagda — kadkada  
gmajne — pašnjak  
gombek — pupoljak  
gorica — vinograd  
gorični — vinogradski  
gril — cvrčak  
grunt — zemljište

hatar — polje  
hertar — govedar

hižni — kućni  
hud — zao  
huncvut — nevaljanac  
huškanje — podcikivanje  
huškati — podcikivati  
huta — koliba

jačka — mala bara  
japa — otac  
japica — čiča, djed  
jen — jedan  
jezero — tisuća  
joči — oči  
joko — oko

kaditi — pušiti  
kajti — jer  
katan — čauš  
kitje — granje  
kitjičje — granje  
koljani — čestitari o Božiću  
krogli — okrugli  
kučica — struk cvieća  
kušlec — poljubac  
kušuvati — cjelivati  
klinčec — karanfil  
klopotec — klepetaljka

lačen — gladan  
Lada, božica plodnosti, ljuba-  
vi i proljeća

lasi — vlasi, kosa  
lehki — lak

mam — odmah  
matul — leptir  
meja — međa  
menjši — manji  
meti — imati  
močati — šutjeti  
morti — možda  
mošnjica — kesica  
mujcek — mačkica  
mustač — brk  
mužek — muž

najbolj — najvećma  
najte — nemojte  
nalukavati se — izvirivati  
nečem — neću  
nej — nije  
ni — nije  
nišči — nitko  
nočka — noćca  
nor — lud  
norc — luđak

oblok — prozor  
odhajati — odlaziti  
oditi — otići  
okinčiti — okititi

pajcek — prase  
pajdaš — drug  
pajdašica — drugarica  
parma — sjenik  
pečnica — krušna peč  
pelati — voditi  
pipa — lula  
pisan — šaren  
piščanci — pilići  
plebanuš — župnik  
podlesék — sása  
podrti se — srušiti se  
polek — pokraj  
poljiče — malo polje  
pomori! — pomozil!  
popek — pup, pupoljak  
poveč! — reci!  
povedati — reći  
povrnuti se — vratiti se  
pozabljen — zaboravljen  
prav (meti) — imati pravo  
preči — proći  
predi — prije  
prek — prieko, skroz  
prepičiti se — probosti se  
protuletje — proljeće  
puca — djevojka  
pucica — djevojčica

rad — rado  
robača — košulja



robec — rubac  
ružiti — štropotati

sem — ovamo  
seri — sieri, sied  
snešica — snašica  
spevati — popievati  
spitavati — zapitkivati  
spominati se — razgovarati  
spominek — razgovor  
spuknuti — izvaditi  
srčece — srdašce  
srček — srdašce  
srečen — sretan  
starjapa — djed  
stezica — stazica  
strela — grom  
sunčece — sunašce

ščekivati — izčekivati  
ščuriček — zrikavac  
šeptati — šaptati  
škaf — kabao  
šlinge — čipke  
šoštati — šušitati  
špotati — koriti, psovati  
štacun — dućan  
šterče — sirotče  
šteri, štera — koji, koja  
štèti — čitati  
štéti — htjeti

štirati se — dičiti se  
štrunja — žica

temni — tamni  
tenje — sjene  
tibetni — od fine tkanine  
trnjiče — trnje  
trobentica — jaglac  
tronuš — prijestolje

ve — sada  
več — više  
večpot — više puta  
vedra — vjedro  
vekši — veći  
venček — vjenčić  
vezda — sada  
vgasiti — ugasiti  
viža — napjev  
vižica — pjesmica  
vloviti — uloviti  
vmoriti se — ubiti se  
vmreti — umrijeti  
vnogi — mnogi  
vogel — ugao, kut  
voski — užak  
vre — već  
vsa — sva  
vse — sve  
vun — van, napolje  
vuni — vani, napolju

vuz — uz  
vužgati — užeci, zapaliti

zaklepati — zatvarati  
zdavanje — vjenčanje  
zdavna — davno  
zdenčec — mali zdenac  
zdignuti — uzdići  
zeti — uzeti  
zginuti — nestati  
zgledati — izgledati  
zgubiti — izgubiti

zibati se — ljuljati se  
ziti — izići  
ziti se — sastati se  
zlati — zlatan  
zlukavati se — virkati  
zmirom — neprestano  
zmočen — izmučen  
zvleči — izvući  
zvraciti — izliečiti

žmehki — gorak, trpak, težak



## VINKO KOS

Rodio se 10. srpnja 1914. godine u Gornjomeđimurskom selu Vučetincu, občina Sveti Juraj na Bregu od seljaka posjednika Petra Kos i Ane rođene Bistrović kao najstarije djece od devetero djece. Nakon burne i siromašne mladosti smirio se konačno u Zagrebu, gdje je posjećivao sveučilišne nauke i posvetio se odgoju mladeži. Osnovao je u Zagrebu prvi Dječji grad.

Dosada je izdao sljedeća djela:

Vodopad, prvo izdanje 1939., drugo izdanje 1942.

Kipar, 1941.

Božićne zvjezdice, priča 1941.

Zlatna jabuka, 1942.

Dušenka, priča 1943.

Šišmiš, 1943.

Za priču Dušenka bio je 1943. godine nagrađen državnom nagradom, a neke su mu pjesme prevedene na njemački, talijanski, rumunjski i španjolski jezik.



## SADRŽAJ

### Protuletje

Štimajte se, štimajte . . . . .	9
Spominek . . . . .	10
Lada . . . . .	11
Kotorijske rože . . . . .	12
Popevkice . . . . .	13
Rožica je na obloku . . . . .	14
Stani se gori, Marica . . . . .	15
Mila moja . . . . .	16
Ftihnuli su . . . . .	17
Ljubav . . . . .	18
Kitičju na drevju . . . . .	19
Če pogledam vu to polje . . . . .	20
Mesečina . . . . .	21
Joči . . . . .	22
Slavujček . . . . .	23
Stezica . . . . .	24
Klinčeci . . . . .	25
Mama mene špota . . . . .	26
Mala igra . . . . .	27
Matul . . . . .	28
Protuletje . . . . .	29
Drenek . . . . .	30



Dešč škropi . . . . .	31
Potok . . . . .	32
Protuletna . . . . .	33
Mura voda teče . . . . .	34

### L e t o

Tožna je, tožna dobrava . . . . .	37
Veter . . . . .	38
Tri golobi . . . . .	39
Vrbe . . . . .	40
Moj ajngelek . . . . .	41
Kupite mi, mama . . . . .	42
Zapuščeno srce . . . . .	43
'dišel sinek vu vojnu . . . . .	44
Hrustekov Balaš . . . . .	46
Posluhni me . . . . .	47
Med žitom . . . . .	48
Med nami . . . . .	49
Bog moj . . . . .	50

### J e s e n

Bereki . . . . .	53
Ceste . . . . .	54
Međimurje . . . . .	55
Jesenska . . . . .	56
Gorična . . . . .	57
Zvezdice na nebu . . . . .	58
Kak je lepo gledat . . . . .	59
Vrbe . . . . .	60
Fijolica . . . . .	61
Gizdava Mara . . . . .	62

Koljani . . . . .	63
V sobotu na večer . . . . .	64
Starjapa i jesen . . . . .	65
Pod jesen . . . . .	66
Za devetom gorom . . . . .	67
Cmreki v snegu spiju . . . . .	68
Dugi su vaši mustači . . . . .	69
Japi . . . . .	70
Mati sedem žalosti . . . . .	71
Lada . . . . .	77
Manje poznate rieči . . . . .	83
Vinko Kos . . . . .	89











